

25 MAY 2000

Sipadan-Mangsa (Temubual)/I/Bergambar

MANGSA CULIK BOLEH DIBEBAHKAN JIKA RUNDINGAN BERJAYA

Oleh: Jackson Sawatan

JOLO (Filipina), 25 Mei (Bernama) -- Kumpulan bersenjata yang menahan 21 orang, kebanyakannya pelancong asing, di pulau ini sejak sebulan yang lalu berkata mereka boleh dibebaskan lebih awal jika rundingan yang dijadual bermula di sini esok berhasil.

Rundingan untuk mendapatkan pembebasan mangsa itu, termasuk sembilan rakyat Malaysia, yang diculik dari Pulau Sipadan berhampiran Sabah pada 23 April lalu, telah ditetapkan di satu tempat yang tidak dinyatakan di sini esok selepas ia ditunda beberapa kali.

Pemimpin kumpulan itu, Galib Andang, atau lebih dikenali sebagai Commander Robot, berkata demikian dalam satu temubual eksklusif dengan Bernama di satu tempat persembunyian di mana mangsa penculikan itu ditahan, kira-kira 40 km dari sini hari ini.

Rombongan Bernama itu mengambil masa 90 minit dengan menaiki jeepney atau beca bermotor untuk tiba di tempat persembunyian itu yang terletak di sebuah ladang kelapa.

"Jika rundingan formal itu berhasil, pembebasan mangsa berkenaan boleh dibuat dalam masa satu jam. Jika rundingan itu tidak berjalan dengan baik, ia mungkin mengambil masa 10 hari," kata Robot, yang bertutur dalam bahasa Suluk.

Roland Ullah, seorang penyelam Filipina yang bekerja di Sipadan dan seorang daripada mangsa culik itu, bertindak sebagai jurubahasa bagi temubual itu.

Temubual itu diadakan dalam suasana tegang ketika kira-kira 80 orang yang lengkap bersenjata sebelum itu menemui rombongan Bernama setibanya di tempat persembunyian pada kira-kira pukul 1.50 tengah hari.

Selepas memeriksa pengenalan diri mereka, kira-kira 25 daripada anggota bersenjata itu berkawal semasa pemimpin mereka ditemuramah oleh rombongan Bernama yang terdiri seorang wartawan, seorang jurugambar dan seorang jurukamera TV Bernama.

Menurut Robot, satu daripada syarat bagi membolehkan rundingan itu dimulakan ialah kehadiran kesemua lima pegawai yang dilantik kerajaan Filipina dengan jumlah yang sama dari pihaknya, termasuk dirinya sendiri.

Mereka ialah ketua perunding Filipina Robert Aventajado, gabenor Sulu Abdusakur Tan, wakil khas Libya Abdul Rajab Azzaroug, pemimpin Islam tempatan Ibrahim Ghazali dan seorang lagi wakil khas, Dr Farouk Hussain.

Selain Robot, kumpulan bersenjata itu akan disertai oleh ketua staf kumpulan itu Raddulan Shahirun, Dr Abu Abdin Jundain, Mujib Susukan dan Nadzmi Saaddula, atau juga dikenali sebagai Commander Global.

"Rundingan formal itu boleh berjaya jika kesemua lima perunding itu hadir. Apabila kesemua mereka hadir baru kami akan menghadiri rundingan itu. Jika seorang daripada mereka tidak hadir, rundingan itu tidak dapat dimulakan," katanya.

Bagaimanapun, beliau menegaskan bahawa tidak harus ada usaha untuk mensabotaj rundingan itu, yang beliau jelaskan sebagai kehadiran tentera Filipina di kawasan sekitar.

"Tidak harus ada sabotaj. Pasukan tentera tidak boleh dipercayai. Bagaimanapun polis kebangsaan Filipina boleh bertindak sebagai pasukan keselamatan bagi rundingan itu," katanya.

Ketika ditanya kenapa rundingan itu tergendala beberapa kali, Robot berkata ia adalah disebabkan oleh kehadiran pasukan tentera di kawasan yang berdekatan dengan tempat mangsa culik itu ditahan.

"Mereka telah memburu kami dan kami terpaksa menukar tempat persembunyian sebanyak empat kali setakat ini. Ini sebabnya kenapa rundingan itu tergendala. Sebenarnya, kami telah menyatakan tuntutan kami lebih awal lagi," katanya.

Ini telah mengakibatkan kejadian tembak-menembak di antara pasukan tentera dan kumpulan itu sepanjang dua minggu pertama krisis penculikan itu.

Robot berkata rundingan itu juga tidak dapat diadakan lebih awal kerana "terdapat terlalu banyak utusan".

"Kira-kira 20 utusan telah menghubungi atau datang berjumpa kami. Oleh itu kami keliru dengan siapa kami perlu mengadakan rundingan itu," katanya.

Beliau mengulangi dua tuntutan penting kumpulan itu bagi mendapatkan pembebasan mangsa culik itu -- penubuhan sebuah negara Islam yang merdeka di Mindanao yang majoritinya orang Islam dan pengujudan Suruhanjaya Sabah untuk menyiasat apa yang beliau dakwa sebagai "pelanggaran hak asasi manusia" terhadap rakyat Moro.

Robot juga berkata pihaknya akan membangkitkan "beberapa perkara lain" semasa rundingan itu. Beliau enggan mengulas.

Semasa temubual itu, Robot merampas mikrofon Bernama TV dan membuat kenyataan ini: "Saya memohon maaf kepada orang Islam di Sabah dan juga kepada Perdana Menteri (Malaysia) Dr Mahathir Mohamad di atas perbuatan kumpulan saya ini. Bagaimanapun, ia dilakukan untuk mendesak penubuhan sebuah negara Islam di Mindanao.

"Kami mengambil tawanan itu di perairan Sabah bukan kerana kami mahu membawa keluar Sabah dari Malaysia," katanya.

Rombongan Bernama itu kemudian dibawa ke sebuah pondok buluh di mana sembilan rakyat Malaysia itu ditahan dan dibenarkan untuk menemuramah mereka.

Mereka berkata walaupun mereka berasa tidak berdaya dan kecewa, mereka masih menaruh harapan bagi pembebasan mereka.

Mereka juga meminta keluarga mereka supaya bersabar menanti kepulangan mereka.

Tiga daripada tawanan Malaysia itu, Kua Yu Loong, Lee Hock Leong, kedua-duanya tukang masak di resort di Sipadan itu, dan Ken Fong, seorang lagi pekerja resort, bercakap kepada Bernama TV dalam bahasa Cina, ditujukan khas kepada keluarga mereka di tanahair.

Mereka mengucapkan terima kasih kepada kerajaan Malaysia terutamanya Dr Mahathir kerana mengambil berat dan di atas usaha untuk mendapatkan pembebasan mereka.

Mereka berkata mereka telah menerima makanan dan ubat-ubatan yang dihantar oleh kerajaan Malaysia.

"Kami tidak dianiaya oleh mereka yang menahan kami di sini. Jangan bimbang dan kami berharap agar dapat keluar dari sini tidak lama lagi," kata mereka.

Rombongan Bernama itu juga melihat tawanan lain bergerak di sekitar kawasan itu, termasuk Renate Wallert, wanita Jerman yang dilaporkan sakit tenat.

Tawanan lain ialah suami Renate, Marc dan anak mereka Warner, dua rakyat Afrika Selatan, dua rakyat Perancis, dua rakyat Finland, dua rakyat Filipina dan seorang rakyat Lubnan.

Robot juga berkata pendatang Filipina di Sabah yang tidak melakukan sebarang jenayah tidak patut ditahan.

"Hanya jika mereka melakukan jenayah atau terbabit dalam aktiviti jenayah seperti penyeludupan dadah wajar ditangkap," katanya, dengan merujuk kepada operasi polis terhadap pendatang tanpa izin berikutan insiden penculikan di Sipadan itu.

Sabah kini menjadi tempat penginapan kepada beribu-ribu pendatang Filipina yang mula lari dari selatan Filipina pada tahun 1960-an berikutan satu pemberontakan.

Sebelum meninggalkan tempat persembunyian itu, jurukamera TV Rostam Ramli sempat memberikan sehelai sejadah kepada Robot.

Pemimpin kumpulan itu berkata: "Saya tidak dapat membalas pemberian ini tetapi hanya Allah SWT boleh berbuat demikian".

-- BERNAMA

JS AU AKD

